

Universitäts- und Landesbibliothek Tirol

Viam Regiam Lusatiae Superioris

Schwartz, Johann Friedrich

[Wittenberg], 1732

Praeses Respondenti S.VO salutem

[urn:nbn:at:at-ubi:2-520](#)

P R A E S E S
R E S P O N D E N T I S V O
S A L V T E M .

Ista de via regia per Lusatiam lucubratiuncula,
quam nunc publice proponis ac propediem
me præsidente tueberis, tota tua est, nihilque
in ea meum. Venisti scilicet ad me sponte,
velleque te de hoc argumento disputare dixisti,
accepisti aliquot ex bibliotheca mea libros, & in-
teriecto circiter mense, reversus obtulisti mihi præ-
sens scriptum. Inspexi ego id cursim saltem,
quod negotia mea mihi longam moram non in-
dulgent, sed tamen cum voluptate. Animadverti
enim, te ultra, quam vulgo solet, laborasse, ut
latine & emendate scriberes. Scio ego, quam id
sit difficile in commentationibus juridicis, quas
non sine caussa *Plinius* literas illiteratissimas ap-
pellat. Nosti locum ejus in epist. 10. libri 1. *Distrin-*
gor officio, ut maximo, sic molestissimo; sedeo pro
tribunali, subnoto libellos, conficio tabulas, scribo
plurimas, sed illiteratissimas, literas. Oportet ta-
men jureconsultum omni ope & opera eniti, ut
in forensibus etiam caussis stylo non quidem pror-
sus polito, sed tamen minus, quam alii, barbaro
utatur. Quod quum tu quoque feceris, charissi-
me

me respondens, laudo diligentiam tuam & ingenii elegantiam. Quod vero ad ipsum opusculi tui argumentum attinet, mirifica ex eo tua in patriam tuam pietas elucet. Placebit ea cordatis omnibus, ac, si quid etiam abs te in elaboratione peccatum fuit, facilius excusabit. Ego, quantum quasi per transennam præteriens strictim videre potui, nihil, quod venia magnopere opus esset, comprehendendi, atque adeo vel nihil, vel pauxillum, emendavi, diplomata etiam inserta, sicut erant, tuam fidem sequutus, reliqui. Nihil, quod juribus Regis nostri adversaretur, aut eum cum vicinis principibus committere posset, observavi. Si quid vero positum est, privatorum commodis forte contrarium, hoc ego, quamdiu alteram partem non audivi, meum non facio, sed saltem e cathedra, more academico, tuebor. Norunt omnes, scripta hujus generis nemini ius suum, si quod habet, auferre. Ne tamen prorsus asymbolus sim, adieci corollaria quædam ex doctrina de viis publicis & de vectigalibus, permittoque his, qui nobiscum decertabunt, sive hæc, sive ipsum scriptum tuum, oppugnare. Tu interim vale, & hac, quam strenue ingressus es, virtutis via porro incede.

Datum Vitembergæ XIII. Kl. Jul. anni

clo lō xxxii.

COROL-